

Biografias litteraras

■ **Biografias fictivas, biografias realas, biografias da vitgs e biografias d'ustarias. Talas biografias ed auters texts datti da leger en la «Litteratura 36», cumparida quest atun.** En la retscha «Litteratura», edida da l'Unien per la Litteratura Rumantscha, cumpara dapi passa 30 onns regularmain in tom cun novs texts rumantschs (prosa curta fictiva, essais, lirica, translaziuns). Questa ediziun nr. 36, sut la redacziun da *Benedetto Vigne* e *Silvana Derungs*, sa deditgescha a texts biografics. Auturas ed auturs èn sa laschads inspirar dal tema ed han furni biografias da tuts genres: biografias fictivas e main fictivas, biografias curtas e pli lungas.

Il cumenzament da la «Litteratura» fa *Iso Camartin* che descriva co in sutlittinent russ ha pudì nascher mo pervi dad in sbagl da comma. La biografia da quest sutlittinent Dentant na pon ins betg mo leger, quella è era vegnida messa en musica. L'autura *Romana Ganzoni* lascha raquintar la meglra matematica dal mund la spira vardada da sia vita, p. ex. ch'ella saja naschida or da la mutschigna dad in cusrin dad in tschert Zeus... A moda divertenta guarda l'autur engiadinais *Göri Klainguti* enavos sin ses temp da recruta ed analisescha en ses text «Che füss be gnieu our da me sainza il militer svizzer?» ils effects da la recruta (ensem en cun il latg-chaura) sin il decurs da sia vita.

Betg la biografia dad ina persuna, ma bain in'episoda or da la biografia dad ina ustaria preschenta *Silvio Camenisch* en ses text «Ell'ustria Tödi»: umens e dunnas van en ed or dad ustaria, dattan jass,


sdiavlan, salidan e discurren amiaivla-main, pensond per sazez il lur. En lur mez è la persuna principala, il Josef da café.

Ulteriuras persunas che han scrit biografias per la Litteratura 36 èn p. ex. *Rome-di Arquint* («Ir a spass a l'ur dal tschêl»), *Fadrina Hofmann* («Mez e mez»), *Erica Lozza Pasquier* («La vischnanca ed igls sies giasts»), *Claudio Spescha* («Medaglias per in meglia mund – ni: Emprerder dils Soviets»). Sper ils texts biografics datti era texts libers dal tema principal: p. ex. cun las «Canzuns dalla fuortga», poesias dal poet tudestg *Christian Morgenstern*, translataidas en rumantsch da *Hubert Giger*. La «Litteratura» preschenta era mintgamai ils texts dal Premi Term Bel da l'onn precedent als Dis da litteratura; l'onn 2016 èn quai stads texts da *Rut Bernardi*, *Alice Bertogg*, *Romana Ganzoni*, *Stina Hendry* e *Dominic Poble*.

Il 2017 è mort l'autur sursilvan Dumeni Capeder; en in necrolog sa regorda *Florentina Camartin* dad el e sia ovra litterara. Terminada vegn la «Litteratura 36» medemamain cun in text dad *Iso Camartin*, numnadamain cun la laudatio ch'el ha tegnì a chaschun da la surdada dal premi SRG.R 2017 al comité dals Dis da Litteratura. L'ediziun da quest onn è illustrada da *Jaromir Kreiliger* che ha embellì la revista cun fotografias or da la seria «Amicezia».

Litteratura 36 «Biografias» (Unien per la Litteratura Rumantscha ULR): prosa, lirica, essais, en idioms e rg, 160 paginas, cun illustraziuns. 20 francs, da retrair en libreria u sur la pagina www.litteraturarumantscha.ch

Silvana Derungs



La «Litteratura 36», cumparida quest atun.

MAD